



Dalá golbma Sámediggepresideantta govvejuvvon guovvamánus 2005:s. Lars Anders Bær, Ruota Sámediggi, Pekka Aikio, Suoma Sámediggi ja Sven-Roald Nystø, ovddit Sámediggepresideanta Norggas. Govva: MIN ÅIGI.

## Davviriikkalaš sámekonvenšuvdna

**S**ÁMIRÁÐÐI LEI VUOSTTAS MII LOKTII JURDAGA ÁSAHIT Davviriikkalaš sámekonvenšuvdna 1986 Sámekonferánsas. 1992 Sámekonferánsas čuovvolddje ášši. 1998:s ášši giedahallojuvvui oktasaš Suoma, Norgga ja Ruota sámi vuoigatvuodaidlávdegotti čoahkkimis.

Davviriikkalaš ráđi 46. čoahkkimis, guovvamánu 28. b. 1995:s Reykjavikas Islánda, deaivadedje Suoma, Norgga ja Ruota ministarat geain lei ovddasvástáduš sámi áššiide. Sii mearidedje álggahit barggu Davviriikkalaš sámekonvenšuvdnain.

Suoma, Norgga ja Ruota sámi áššiid ministarat oktan dáid golmma riikka sámediggepresideanttaiguin, nammadedje čakčat 2002 áššedovdijoavkku mii galggai ráhkkanahhtit Davviriikkalaš sámekonvenšuvndaárvalusa. Golmma jagi árijálaš barggu mannel, geigii áššedovdijoavku árvalusas jahkásaš čoahkkimis skábmamánu 16. b. 2005:s Helssegis. Dán čoahkkimis oassálaste Suoma, Norgga ja Ruota sámi áššiid ministarat ja Suoma, Norgga ja Ruota golbma sámediggepresideanttat. Áššedovdijoavkku jođihii professor Carsten Smith, gii lea leamaš Norgga alimusriektejustiariuš.

Konvenšuvdnaárvalus sisttisoallá 51 artihkkala juhkkjuvvon 7 kapihttalii. Deháleamos ulbmil dán árvalusas lea nannet ja gievruahhtit sámi álgoálbmotvuoigatvuodaid, mas lea erenoamáš deaddu várjalit ja ovddidit sámegeala, sámi kultuvrra, ealáhusaid ja servodaga. Konvenšuvdnaárvalus cealká ahte dan golmma riikkas leat sápmelaččat álgoálbmot, ja okta álbmot geat orrot riikarájiid rastá. Konvenšuvdnaárvalus sisttisoallá unnimus gáibádusaid mat leat vuodđuduvvon riikkaidgaskasaš olmmošvuoigatvuodagáibádusaide mat juo gávdnojit, ja mat leat boahhtimin.

Áššedovdiidjoavku árvala ahte konvenšuvdna galgá mearriduvvot Suomas, Norggas ja Ruotas, ja dat ii galgga mearriduvvot ovdal dat golbma Sámedikki leat dohkkehan konvenšuvdnaárvalusa. Konvenšuvdnaárvalus sáddejuvvui gulaskuddamii oktanaga buot golmma riikii 2006 álggus. Árvalusa meannudeami leat dasto digaštallamin.

[www.samediggi.no](http://www.samediggi.no)

[www.galdu.org](http://www.galdu.org)

[www.dep.no/aid/](http://www.dep.no/aid/)

Samene – en håndbok, Karasjok 2003